

# TE HEHEURAA API.

---

I neinei hia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

---

*“E hi'opoa maite i te mau mea atoa ra; e tei maitai ra e tapea maite.” 1 Tes. 5: 21.*

*“Te haaputu ra te feia paari i te ite; area te vaha o te maamaa ra o te pohe ta'na i hopoi mai.” Mas. 10: 14.*

---

Nu. 3.

12 Ditema 1907.

Mat. 1.

---

## Te Mau Tapao No te Ekalesia A Iesu Mesia.

---

E tamarii te taata atoa na te Atua. Te hinaaro nei Oia ia noaa to ratou maitai, e ia au maite i ta'na. Mat. 5: 48. Ua tonono maira Oia i Ta'na Tamaiti fanau tahi i roto i teie nei ao e haapii mai i te taata i te e'a e tae atu ai i te Atua-raa. Aore Iesu i mana'o e e mea au ore ia faito atoa Oia i te Atua Metua, e o to'na ia hinaaro ia hoê atoa to tatou huru aau e to'na. Phil. 2: 5, 6. Ua haapii mai te Mesia i ta'na evanelia ia faaaupia te taata atoa i te Atua Metua. Ua faatia ihora Oia i ta'na ekalesia i nia i te fenua nei ia haapii-tamau-hia â ta'na evanelia i muri a'e i to'na revaraa'tu i nia i te ra'i e ia tahoêhia te aau o te taata atoa. Aita râ te aau o te taata i hoê e inaha noa nei, ua amahamaha râ te taata atoa e e ono hanere e te tiahapa ekalesia tei faatia-hia e te taata i roto i teie nei ao. Na te Atua anei taua mau

ekalesia ra i faatia? Na te Mesia iho i pahono mai i te matahiti 1820, Aita. E ere te hoê o taua mau ekalesia i te akalesia mau na'na; e mea faufau ta ratou mau parau tu-mu ia'na ra; e feia haavare taua mau orometua atoa ra; te haafatata nei ratou ia'na i to ratou utu, tei te atea ê râ to ratou aau; te haapii nei ratou i te parau a te taata ei mono i te parau a te Atua; e hoho'a paietî to ratou, te hu-na râ ratou i te mana o te Atua.

Hoê noa iho ekalesia ta te Fatu i faatia i roto i teie nei ao. E teie nei, no te mea ua hanere te ekalesia e vai nei, ia imi te taata e teihea te ekalesia mau i faatiahia e Iesu Mesia e tia'i, e teihea te ekalesia i faatiahia e te taata o tei farii i te tahi pae o te parau a te Atua e tei faarue i te tahi pae. Te vai nei te mau tapao e rave rahi e itea'i te ekalesia mau a Iesu Mesia, eiaha râ e mana'o e e papu te mana'o i te imiraa maori râ ia ore te tiaturi i te parau na te taata, e ia tamauhia te aau i nia i te parau a te Atua.

Na te parau a te Atua e faaite papu mai i te mau tapao e itea'i ta'na ra ekalesia mau, e taa ê roa'i te mau ekalesia atoa a te taata.

*Tapao Hoê.* Te haamori nei te ekalesia mau a Iesu Mesia i te Atua no Aberahama, no Isaaka e no Iakoba, tei faarooria to'na re'o e Ioane Bapetizo, Mat. 3: 17; tei iteahia to'na tino i te parahiraa i nia i to'na ra terono e Setephano, Ohi. 7: 55, 56; e e Ioane pîpî here hoi, Apo. 4: 1-4; 5: 1, 7. O Iesu hoi to'na ra hoho'a mau. Heb. 1: 3. Ioa. 14: 8, 9. I hamanihia hoi tatou i to'na ra heho'a. Gen. 1: 27.

Ia ite tatou i te hoê ekalesia i te haamoriraa i te idolo, e aore râ i te Atua minemine, e aore râ i te Atua mata'i, e aore râ i te hoê noa'tu Atua aita e au te taata i to'na ra hoho'a, e tapau papu roa ia e e ere te reira ekalesia i te ekalesia mau na Iesu Mesia.

*Tapao Piti.* Ua haapao ihora Iesu Mesia i te toroa aposetolo i roto i ta'na ra ekalesia, o mua ia, 1 Kor. 12: 28. Mat 10: 1-4. Ia ite tatou i te hoê ekalesia aita te toroa



aposetolo i roto, e tapao papu roa ia e ere ia i te ekalesia i faatiahia e Iesu Mesia, no te mea ua tuu atura Oia i te aposetolo i roto i ta'na ra ekalesia.

*Tapao Toru.* Ua tuu atu Iesu Mesia i te peropheta i roto i ta'na ra ekalesia. 1 Kor. 12: 28. Eph. 4: 11. Ia ite tatou i te hoê ekalesia aita te peropheta i roto, e tapao papu roa ia e ere ia i te ekalesia na Iesu Mesia, na te taata râ.

*Tapao Maha.* Ua tuu atu Iesu Mesia i te haapii evanelia i roto i ta'na ra ekalesia. Eph. 4: 11. Ohi. 21: 8. Ia ore teie nei toroa i roto i te ekalesia, e tapao ia e ere na te Atua taua ekalesia ra.

*Tapao Pae.* Ua haapao atoa te Atua i te tahu'a rahi i roto i te ekalesia. Heb. 5: 1.

*Tapao Ono.* E toroa hitu ahuru tei roto i te ekalesia a Iesu Mesia, e ua a'o haere ratou i te evanelia. Luk. 10: 1, 17.

*Tapao Hitu.* Tei roto atoa i te ekalesia a te Fatu te toroa episekopo. Phil. 1: 1. 1 Tim. 3: 1. Tit. 1: 7.

*Tapao Vau.* Tei roto atoa i te ekalesia a te Fatu te toroa peresibutero. Ohi. 14: 23. 1 Tim. 5: 17. 1 Pet. 5: 1.

*Tapao Iva.* Tei roto atoa i te ekalesia a te Fatu te toroa tahu'a. Luk. 1: 5. Apo. 5: 10. 20: 6.

*Tapao Ahuru.* Tei roto atoa i te ekalesia a te Fatu te toroa haapii. Ohi. 13: 1.

*Tapao Ahuru Ma Hoê.* Tei roto atoa i te ekalesia a te Fatu te toroa diatono. 1 Tim. 3: 8. Phil. 1: 1.

Ia ore teie nei mau toroa, oia hoi, te aposetolo, te peropheta, te haapii evanelia, te tahu'a rahi te hitu ahuru, te episekopo, te peresibutero, te tahu'a, te haapii e te diatono i roto i te hoê ekalesia, e tapao papu roa ia e ere ia i te ekalesia ta Iesu i faatia i rotopu i te taata nei, no te mea na te Atua iho i tuu i roto i ta'na ra ekalesia. Teie te tumu i haapaohia'i teie nei mau toroa i roto i te ekalesia, oia hoi ia faaauhia te feia mo'a i te ohipa ra e orometua e ia tahoêhia te aau o te taata atoa. Eph. 4: 11-16.

*Tapao Ahuru Ma Piti.* Te vai amahamaha noa nei â to teie nei ao, e no reira ua ite-papu-hia e aita i oti te ohipa i faaauhia na te feia toroa i roto i te ekalesia a Iesu Mesia, aita hoi e tia i te hoê o teie nei mau toroa ia faarue atu i te tahi. 1 Kor. 12: 18-20.

Ia ite tatou i te hoê ekalesia i te na ô te haapiiraa e, ua ore te tau i haapaohia no teie nei mau toroa i roto i te ekalesia, ua riro ia e tapao papu e ere ia i te ekalesia na Iesu Mesia, no te mea ua faahapa te reira huru haapiiraa i te parau mo'a. 1 Kor. 12: 27-28.

Teihea te ekalesia mau a Iesu Mesia? Ia ite tatou i te hoê ekalesia na teie nei mau toroa atoa i roto i faaitheia i nia nei, e tapao papu roa ia e o te ekalesia mau ia a Iesu Mesia, no te mea ua'na teie nei mau toroa i tuu e i haamanu i roto i ta'na ra ekalesia.

(E taatihia mai teie nei parau.)

I roto i na matahiti e piti i mairi a'enei e 47,000 Buka a Moromona tei hoohia e te mau oronietua o tei a'o haere i te evanelia i te tufaa fenua ra o Ilinoi e te mau vahi i fatata mai, e 70,000 mau buka rarahi tatararaa evanelia tei hoo-atoa-hia. Hoê milioni buka nainai, e 32 apî i te buka hoê, e e piti milioni buka nainai a'e tei opere-noa-hia na te taata. I te matahiti 1844 na taparahihia te peropheta ra o Iosepha Semita i roto i te tufaa fenua ra o Ilinoi no te mea ua parau oia e na te Atua i heheu mai i te Buka a Moromona ia'na ra. Ei teie nei râ, te hoo nei ratou i taua buka ra.

### TE VARUA TAATA.

“E varua râ tei roto i te taata nei; e na te uru a te Puaihope ra i noaa'i ia'na te ite.” Iob. 32: 8. Te ite nei te taata atoa e ia faaamu ratou i to ratou mau tino e tia'i, e ia ore ra, e pohe ratou. E rave rahi râ te taata tei ore i ite e, ia faaamu-atoa-hia te varua taata e tia'i, e ia ore ra e pohe atoa ia. Tera te maa e au ia amuhia e ora'i te varua, oia hoi te mau parau maitatai atoa. Ia hoo noa te taata i te mau buka maitatai atoa e ia taio e ia feruri hoi i te mau parau i papaihia e tia'i. Eiaha ia pau te tao'a atoa i roto i te opu; ia pau râ te tahi pae i te faaîraa i te aau i te mau mana'o popou, te ite e te paari. Mas. 3: 13-18.



## TE POHERAA O RUA.

Ua pohe oia i te 9 no Novema, 1907, i Papeete nei. E tamaiti oia na Mauati, i fanau i Faite i te matahiti 1841, e ua bapetizohia e ua faatoroahia ei peresibutero i roto i te Ekalesia a Iesu Mesia i te Feia Mo'a i te Mau Mahana Ho-pea Nei. E ua rave itoitō oia i te mau ohipa o te ekalesia i te mau matahiti e rave rahi. Ua farii oia i te taata no to'na mana'o maitai e te aroha noa, e ua tauturu'afu oia i ta'na i hinaaro i te tauturu. E taata itoitō oia mai te taata atoa nei â; e i te tau i roohia mai ai te fenua Tuamotu i te ati miti a pau ai to ratou oire, riro atura te mau taata i te miti. E inaha, tei ia'na te hoê faurao iti, o te ravea ia i ora mai ai te pae rahi o te mau taata. Ahiri aita oia nei, e rave rahi atura ia tei pohe. O te hoê ia ohipa roo maitai ta'na i rave i to'na oraraa, e ua horoa maira te hau Farani i te hoê medai ei tapao no ta'na ohipa. E hui raatira oia no te mataeinaa i Faite; ua auraro oia i te ture e ua faatura i te hau Metua e tae noa'tu i te tau i tupu mai ai to'na ma'i; afahia mai ai oia i Papeete nei, e i te fare ma'i to'na poheraa. E tei Hamuta to'na tănuraahia i niā i te hoê aivi, i te fenua o Tane.

E no reira ia haamana'ohia to'na itoitō rahi i te pae faaroo e i te paeau atoa o te oraraa nei.

I roto i te afa o teie nei matahiti i te fenua Sweeden ua hoohia e te mau orometua o te ekalesia e 28,956 buka rarahi tatararaa evanelia, e ua operehia 142,755 buka nainai; ua mataitai i na utuafare e 93,156, e ua paraparau i na taata 12,526 i te evanelia a Iesu Mesia.

I te 8 no Novema ua ho'i atura i Amerika na orometua ra o Alama, te tamuta i faatia i te fare o te Tonitara Amerika i Papeete nei, e o Adamu Minera. Na nia i te Mariposa to raua revaraa'tu. Ua anihia Adamu e te peropheta ia ho'i no te paruparu o to'na ra metua tane, e 77 to'ua matahiti.

## Te “Moromona.”

Eaha te auraa o te parau “Moromona?” E peropheta Moromona na te Atua, i fanau oia i te M. F. 311 i roto i te fenua ra o Amerika. Ua tuatapapa oia i te mau papaa parau i papaihia e te mau peropheta ati Nephi mai te matahiti H. I. 600 e tae noa’tu i te M. F. 400 a huna’tu ai oia i te reira i roto i te aivi ra o Kumnora, e na te Atua e tiaï, e au i te faaueraa a te Atua ia’na.

Ua heheuhia taua papaa parau ra e te Atua i te matahiti 1827 ia Iosepha Semita, te peropheta rahi no te tau hopea nei, e na roto i te mana o te Atua ua iritihia ei reo Beritani, e ua mairihia te i’oa “Te Buka a Moromona,” no te mea na te peropheta ra o Moromona taua mau papaa parau ra i tuatapapa. Ua topahia e to te ao nei te i’oa “Moromona” i nia i te feia atoa e farii i te Buka a Moromona, oia hoi ua parauhia ratou e to te ao nei ei ekalesia “Moromona,” ei haapaoraa “Moromona,” ei “Moromona,” e ei “Momoni.”

O te i’oa mau anei te reira no te ekalesia? Aita. Na Iesu iho i mairi i te i’oa i nia i ta’na ekalesia, oia hoi Te Ekalesia a Iesu Mesia i te Feia Mo’a i te Mau Mahana Hopea Nei, mai tei faaitehia i roto i te Buka Fafau, 115:4, te na ô nei te taioraa: “E na ô ia ta’u ekalesia i te parauhia i teie nei mau mahana hopea, oia hoi, Te Ekalesia a Iesu Mesia i te Feia Mo’a i te Mau Mahana Hopea Nei.”

Ua tupu anei to matou inoino e te riri ia parauhia matou ei “Moromona,” e ei “Momoni?” Aita. E ere râ i te faahitiraa tia. Te faaoromai nei matou ia parauhia matou ei “Moromona” e ei “Momoni” mai ta te feia mo’a i te tau o Iesu Christ i faaoromai a parau-tahitohito-hia’i ratou ei “Cherisetiano.”

Eaha te mea ua neneihia te parau “Moromona” i roto i te vea? Ua neneihia no te mea e taiohia te vea e te mau taata e rave rahi o tei ore i ite i te i’oa mau o te ekalesia.



Ua tuuhia râ teie tapao (“) i mua e teie tapao (”) i muri, na ô, “*Moromona*,” ei faaiteraa papu e ere ia na te ekalesia taua i’oa ra, e mea topahia râ e to rapae au. Ua mauruuru roa râ matou ia parauhia matou i to matou i’oa mau, oia hoi, Te Ekalesia a Iesu Mesia i te Feia Mo’a i te Mau Mahana Hopea Nei.

A imi i roto i te mau buka maitatai ia roaa mai te parau paari.

### Te Mau Parau Rii Api.

I te 6 no Atopa ua faatoroahia Anatone W. Ivini ei aposetolo ei mono ia Tihoti Teadore i pohe ra.

Ua parere te parau i roto i te oire ra o Honolulu i te fenua ra o Havaii, e ua fatata te faaipoiporaa o te arii vahine ra o Liliuokalani no Havaii e te arii tane ra o Arii Paea no Tahiti.

I roto i na matahiti e 8 i mairi a’enei ua pau e maha hanere milioni dara na te hau Amerika i te faatereraa i te hau e i te haamaitairaa i te mau fenua Philipine, o Manila te oire rahi. E fenua haapau moni rahi ia.

I te rui 8 no Novema i roto i te oire Duluth i Amerika ua pau i te auahi e 3 fare tavriraa sitona, e 40 fare parahiraa, e 4 pahi e e 700,000 pute sitona. Hoê taata i pâpâ i te auahi. Ua haere oia i roto i te fare ura e tii i te afata.

I roto i te avae ra o Ateté 1,200,000 pereoo i te repo o tei iritihia mai no roto mai i te haere’a pahi te hamanihia nei i Panama i teie nei. Mai te mea e tamauhia teie huru itoitoe e oti taua ohipa ra i na matahiti e pae e aore râ e ono.

Ua anihia te Tavana Rahi no te fenua ra o Canada, te hoê o te mau fenua aihuaraa no Beritani ia opahi i taua fenua ra i te mau taata Asia atoa ra. Aita te hui raatira o taua fenua ra i au maite atu i to Iapone e to Inidia o tei haere noa i reira parahi ai.

I roto i te avae Titema nei e haamata’i na pahi manua Amerika e 27 i te tere, mai te tufaa fenua maira o New York e haaati haere i te fenua Amerika Apatoa, e tae noa’tu i te tufaa fenua ra o Tarafonia. 14,000 maille te roa o taua tere ra; 117,600 tone arahu e pau a tae atu ai ratou i Tarafonia.

I te 17 no Atopa ua hamata te hoê sotaieti e haponu atu i te parau mai te fenua ra o Amerika e tae i te fenua ra o Beritani na roto i te reva, aita e niuniu. Hoê raera te parau hoê ia haponu. Ua haponohia te parau na roto i te tahi mau machine uira, e mai te amuraa mata nei te oioi ua tae atu i Beritani ma te hapa ore.

I te 16 no Atopa ua horoa noa'tu te taata ra o Iese Kanita \$100,000. 00 i te hoê haapiiraa rahi no te ekalesia, i faatiahia e te peropheta ra o Berekeama Iouna i roto i te oire ra o Provo, e 50 maile i te atea i Roto Miti. No to'na hinaaro i te tauturu i te ohipa haapiiraa, e roaa'i te ite i te taata atoa ra, i na reira ai oia ra.

17 milioni tamarii i roto i te fenua Rusia, mai te matahiti ono e tae noa'tu i te 14, aore roa i tae i roto i te haapiiraa ia roaa ia ratou te ite. Ua vaiiho-noa-hia râ i roto i te ma'ua rahi. No reira ua itea-papu-hia te tahi tumu i pau ai Rusia ia Iapone, e i hau roa'tu ai to'na mau peapea i te mau basileia rarahi atoa. A taio i te Mas. 24: 5.

I te 23 no Atopa i te ahiahi ua aueue te fenua o Calabria i te fenua ra o Italia mai te puai rahi. Ua mairi te afa o te mau fare i roto i na oire e toru. E 200 tino taata pohe tei iritihia mai no raro mai i te mau puea fare. Ua mairi puai mai te ûa i muri a'e i te aueueraa ra, e no te mätä'u o te taata ia ho'i i roto i te mau fare aore i ino, ua roohia mai te taata e rave rahi i te toetoe rahi e te ma'i.

Te faaite nei te hoê vea i Rusia i te rahi o te taata i pohe i roto i te orureraa i te hau Rusia i na matahiti e piti e te afa i mairi a'enei. 19,144 i pohe roa, e 27,856 tei puta to ratou mau tino. E 2,381 tei faautuahia i te utua pohe, 1,350 tei taparahi ia ratou iho. E 8,223 taata toroa no te hau i taparahi-huna-hia no te riri o te hui raatira ia ratou. E 60,000 tei faautuahia i te utua tapea i Siberia. Aita râ te orureraa i te hau i manuia.

I roto i te oire Vancouver, B. C., te hoê fenua aihuaraau no Beritani, i te 7 no Tetepa ua tanuu noa te mau taata rave ohipa 10,000 i nia i te mau purumu ei faaiteraa i to ratou hinaaro ia opanihia te fenua i to Asia atoa ra. Ua tiavaruhia e 2,000 Tinito i rapae i to ratou mau fare e ua haapauhia ta ratou tao'a e 5,000 dara. E ia po, ua haapararihia na fare toa Iapone e pae ahuru. E 2,000 Iapone i tipae i taua oire ra i teie nei matahiti. Te rave nei te Iapone i te ohipa ma te moni iti, e no reira i riri ai te mau taata rave ohipa ia ratou.

---

Toae a Maire, Faaau Parau,

Rue Dumont d'Urville, Orovini, Papeete, Tahiti.

Frank Cutler, Imprimeur,

Rue Bréa et de la rue Dumont d'Urville, Papeete, Tahiti.